

# Beixnuengx Gozging

□ Banh Singhhaij / 潘星海

Daeglwg Siujgozging ndaejnyi le fanj baeh de naeuz: “Dauq bienq lwgnyez la? Gvaq 60 bi vunzlaux ngoenznaengz lij buet mbouj dingz, ndok gang nyinz diet cungj saet mbouj ndaej geij ngoenz ne.”

Daegnuengx baez dingq doq hozndat, bek aek naeuz: “Gou lij ndaej gwn ak guh, lix mbouj gvaq bak bi dai cungj da mbouj haep!”

Gij vah neix Dagozging couh mbouj naeuz lansai nyi, cungj lau bohlgw de doxceng mbouj dingz. De fug daegnuengx laux lo ukgyaeuj vanzlij siengj nyaenx hung. Duiyouh le lij ndaej guh baenz saeh hung, de caen liuh mbouj daengz. Dang gvaq lingjdauj caeuj mbouj dang gvaq lingjdauj caen mbouj doxdoengz! De ciengzseiz caeuj gyoengqdoi gangj-riu, danghnaeuz ukgyaeuj lij singj, ngoenznaengz lij ndaej okrog bae byaij yawj, gyaeu ndaej 80 lai bi hix baenz lo, bouboux cungj gyaeu ndaej bak geij bi bae, yaek beuj mbangj vunz bae gwnz ronghndwen youq lo.

Daegnuengx gyoengqde ngoenz-naengz dauqcawq buet, cimh vunz gapbang, ra ngaenz cauh laeb aen swnghdai nungzcangz. Hawj de daj denva ngoenz beij ngoenz lai, lumjbaenz gij saeh neix de caemh miz faenh ndeu, mbouj ngoenzngoenz

gangj cungj lau de lumz bae. Seizneix ngaenz nyaenx ndei cimh ma? Miz coenzvah laux ndeu yienghneix gangj, haexvaiz hawq le nengznyaen mbouj daeuj comz lo. Duiyouh le cij bae cimh vunz ciq ngaenz, beij hwnj mbwn vanzlij nanz ho!

Ngoenzneix, Dagozging caeuj gyoengqdoi baiz heiq, daegnuengx gyoengqdoi daj denva daeuj, heuh de sikhaek gangj bae yienh yihyen, daegnuengx youq gizde ciengj-gouq……

Siujgozging bae cimh boux gencuz gunghsw lauxbanj ciq ngaenz. Boux lauxbanj neix doenghbaez youq lajfwngz de, cibgeij bi gaxgonq ngamq bae guh seng’eiq seiz haenq nanz, de caenhrengz coengh mbouj noix. Ndwen gaxgonq, de cam boux lauxbanj neix ciq ngaenz guh swnghdai nungzcangz, lauxbanj naeuz caenhrengz coengh. Hoeng gvaqlaeng de daj denva cam mbat caiq mbat, lauxbanj caenh rox gangj caenhrengz coengh, cix mbouj miz gangj lai coenz vah lo. Gyangngoenz raennaj seiz, lauxbanj haibak doq dapwngq hawj 500 fanh maenz gonq, lij miz geij bak fanh maenz gvaqlaeng le caiq menhmenh hawj. Dingq lauxbanj yienghneix gangj, de simdoengh dwk raemxda yaek doek. Daj lauxbanj ranzbanh-

goeng okdaeuj le de lumz aen daeh, cienq ndang ma aeu daeh couh dingqnyi lauxbanj daj denva, baeh de ukgyaeuj luenh lo, duiyouh le bienq-baenz lumj sam bi lwgnyez nei…… Gij vah neix lumj aen daengvenj doek roengzdaeuj, dub deng gwnz dingj gyauej de.

Dagozging ganj daengz yienh yihyen, Siujgozging ngamq ciengjgouq gvaqdaeuj lo, ninz youq gwnz congz lij mauh. Gyoengqdoi Siujgozging cungj youq. Seizneix raen gyoengqde, de ndawsim roxnyinh boiqfug gyoengqde. Geij boux vunz neix cungj dang gvaq lingjdauj, duiyouh le mbouj you gwn mbouj you daenj, seizneix ngoenz-naengz lij bae buet hwnj buet roengz vihmaz ne? Yaek loq dang lauxbanj fatcaiz ha? Roxnaeuz mbouj fug laux cij guh hawj vunz yawj swngeij miz bonjsaeh? Danghnaeuz yienghneix siengj couhdwg boux dungxaeb bae yawj goeng ginhswj lo. Gyoengqde dajsuenq guh aen swnghdai nungz-cangz, danghnaeuz guh baenz lo, ceiigonq ik cienz mbanj 2000 lai beixnuengx, gij saeh neix ndaej aeu ngaenz daeuj suenq ma?

Daeglwg ganj daengz, Siujgozging singj lo. Daeglwg gvaiq daxboh naeuz: “Boh ha, mwngz ngoenznaengz luenh buet guh maz nyaenx lai? Ngaenz

duiyouh mwngz lingx ndaej geij bi lo, danghnaeuz mwngz doq yiengh-neix bae lo, mwngz caem mbouj caem ya?”

Dagozging dacaengz daeglwg, yiemzsuk naeuz: “Mbouj ndaej yiengh-neix naeuz boh mwngz. De miz gij siengjgap swngeij, de mbouj dwg guh saeh ngawz.”

Daeglwg mbouj fug, ok sing hung naeuz: “Duiyouh le lij ngvanh guh maz saeh hung, gijneix mbouj dwg yied laux yied uk luenh ma?”

Siujgozging ngauz gyauej doiq daeglwg naeuz: “Gak vunz gak miz ceiqheiq. Miz mbangj vunz guh mbouj baenz gienh saeh he, laux le cungj youq mbouj sim’an……”

Raen daegnuengx raemxda rih okdaeuj, Dagozging gaem fajfwngz daegnuengx heuh geij sing. Daegnuengx cij lae raemxda, mbouj ndaej hai da. De uet gij raemxda daegnuengx, yungh sing hung naeuz: “Mwngz ndeindei yietnaiq ba, deq hingh ndei le, couh ndaej bae guh gij saeh mwngz siengj guh lo. Gyoengqdoi mwngz lij deq mwngz okbae bw!” De yienghneix gangj le, doq nyaenx mbouj ndaej hix raemxda doek-byoegbyoeg……

(sat)

•Sawcuenhrael Lwgnyez•

## Gij Golwgnyez Henz Dahhoengz

□ Lanz Haijyangz Moz Beibei / 蓝海洋 莫蓓蓓

“Mwngz gamj?” Gou hix deng de gik ndaej huj lo: “Daiq gou mbouj ndaq mwngz lai guenj saeh cixbah!”

Aulungzgeiz mbouj oksing lo, dawz fagcamx caeuj duz bya hung, ngaemgyaeuj con gvaq ndoeng-faexnganx, mbouj raen gij ngauez de lo.

Lungzgeiz Lungzgeiz, caen mbouj najgaej;

Dingj gyauej maj nywj, gwnz ga hwnj myaex;

Mbouj miz ranz youq, gouz you doz yietnaiq;

Mbouj miz maz hong guh, bang vunz langh cwxaiz.


Doengzdoi ciengqnga’ nga, souj go neix cienmonz gikbyaep Aulungzgeiz, mbouj rox byawz bien, daengx mbanj lwgnyez cungj rox ciengq, daj souj go neix ndaej rox gij yienghceij caeuj ndwenngoenz Aulungzgeiz lo, byoemgyaeuj de luenhbyubbyub beij gij cazrum lij nyapnyaj, gwnz ga de gij biuj hung naeuh haenx caen lumj hwnj myaex nei.

Aulungzgeiz mbouj miz ranz, couh youq fungh ranz iq daemq laeng miuhaenzvangz, bingzciengz couh

baengh bang vunz guh di hong mbaeu, langhlangh vaiz yiengz ndaej gwn saek donq song donq, ndigah gyoengq lwgnyez youq gya baez raen de, couh rox bekwngz, coh de ngon song sam coenz, mizseiz cingqngamj bungz de mbouj angq, de couh maeuq roengzbae cang guh yaek gip rin daeuj haep lwgnyez, gyoengq lwgnyez ciengz lau ndaej got gyauej couh buetdeuz.

Cijmiz de miz yinxdaeuz seiz, mboujdan mbouj hozndat, dauqfanj rox riunyumnyum riengz gyoengq lwgnyez caez ciengq, de youq baihnaj byaij, lwgnyez couh youq baihlaeng riengz, doq bekwngz doq ciengq, gyoengq lwgnyez yied comz yied lai, de sangset youq baihnaj daiq roen, couh lumj bouxciengq dazyinx bang bing nei, byaijbyaij ciengqciengq. Fwtfat de daengx din, doq gungj hwet maeuq roengz gip gaiq cien hwnjdaeuj cienq ndang couh yaek vut, seizde gyoengq lwgnyez doeksaet ndaej sanq caez, buetdeuz coh seiqlengq, lumj-baenz gyoengq nengznyaen gyobcomz youq gwnz ndang duz bya dai nei, sing hemq sing riu luenhnyagnyag.

Haxbaenh hix mbouj rox dwg byawz youh youq ndaw dah doiq



Gunghcwngz Yauzczuz vad ruz bae coux bawx.

Cwng Ciminj ingj

Aulungzgeiz ciengq hwnjdaeuj lo, cijaeu miz boux he haibak, cibgeij boux lwgnyez couh rox riengzdwk ciengq, gou hix sing hung ciengq, caemhcai youq ndaw raemx mbouj dingz bongh hwnj, song cik fwngz luenh mboengj raemx, angqyangz fouzbeij, lumj gou liuh ndaej daengz nei, cij raen Aulungzgeiz najndaem cienq ndang youh byaij doxdauq daengz henz dah daeuj, fwngzgvaz yaengx sang fagcamx, guh ok gij yiengh yaek gveng coh dou, sing ciengq go fwt daengx roengzdaeuj, caezgya deng haep ndaej cagaenj coh

gyang dah youz bae.

“Ai! Sou yawj, gij haenx dwg maz?”

Gou ndaejnyi Aulungzgeiz youq gwnz haenzdah hemq, baenq gyauej dauq baez yawj, cij raen de aeu fagcamx vix gyang dah baihnaj dou, daemh din sing saenz dwk hemq: “Duz ngwzboengz he! Duz ngwzboengz he!” Dingqnyi miz ngwz, gou doq deng haep ngawh lo, vuengmuengz youz doxdauq coh haenzdah.

“Aiya! Duz ngwzboengz he……” Aulungzgeiz lij hemq.

(caengz sat)